

Vnd sieht gern / Das eyn ander sy
Im glich / vnd stäck im narren bry
Sann narren allzyt hassen dünt
Sie / so mit gutem ding vmb gont
Eyn dor / den andern nit gern sieht
Dem rechten doren doch geschicht
Das er jnn freüden sich nit spar
Das er alleyn nit sy eyn narr
Dar vmb er allzyt flisset sich
Wie yederman syg synen glich
Vnd ratt das er nit sy alleyn
Der narr / der trag den kolben heyn
Wann man sieht eyne der do will
Recht dün / vnd syn jnn wifshyt styll /
So spricht mā / schow den duckelmuser
Er will alleyn syn eyn Carthuser
Vnd tribt eyn apostüzer stodt
Er will verzwiffen gantz an gott
Wir went eben als wol erwerben
Das gott vns loßt jnn gnaden sterben
Als er / wann er schon tag / vnd nacht
Lyt vff den knuwen / bät / vnd wacht /
Er will vasten / vnd zällen buwen /
Er gdar weder got noch der welt truwe
Gott hat vns nit dar vmb geschaffen
Das wir münch werden oder pfaffen
Vnd vor vß / das wir vns entschlagen
Der welt / wir went keyn kuttten tragen
Noch kapp / sie hab dann schellen ouch
Schow vmb den narren / vnd den gouch

